

欽定剿平粵匪方略

欽定勦平粵匪方略卷十七 壬子年

八月十三日 辛卯 調任湖南巡撫張亮基奏言臣

於七月二十八日自常德府水路起程三十日
舟次沅江縣探悉賊匪已由攸縣醴陵北竄直
撲長沙驛路不能前進查沅江縣距省將及三
百里之遙旱路更爲迂緩臣隻身在途隨帶弁
兵不過十人貿貿前往殊屬無益因念常德一

郡係咽喉重地久爲賊所覬覦刻下無兵無餉
防守甚爲單薄於此城暫行駐紮既可豫備防
堵又可催集兵練爲省城援應前在辰州接准
督臣程裔采函稱賊勢北竄極爲猖獗當卽札
調辰沅道所屬土兵一千名令其剋日赴省聽
用而

欽差大臣前次所調黔兵一千名現在銅仁松桃兩

營四百名甫到臣卽令其暫駐常德藉以稍助
聲威擬俟未到之黔兵六百名及土兵催齊酌
留常德防堵外卽分起帶領馳赴長沙知會城
中派出精兵合力夾擊

張亮基又奏言楚南正當有事之際所有幹練
人員俱經派居要地驅策甚屬乏人查有雲南
糧儲道崔光筭辦事結實最爲可靠貴州黎平

府知府胡林翼才識出衆且係湖南益陽人辦理堅壁清野事宜可以聯絡紳民因地制宜湖北黃州府知府徐豐玉循聲卓著才具素優俱係臣所深知合無仰懇

天恩俯念軍務喫緊需才孔亟准令該員等來楚聽候差遣奏入

上命軍機大臣傳諭張亮基曰該撫現抵常德去省較

近自應趕調官兵親督將弁馳赴長沙會同各路援
兵與城中合力夾擊迅解省城之圍萬不可株守一
隅致誤事機大股逆匪仍踞郴州永興一帶該撫俟
省城解圍後督帶精兵或扼要堵剿截其來往竄擾
之路或徑赴郴州相機圍攻爲搗穴擒渠之計徐廣
縉計可抵楚該撫統轄全省責無旁貸務當和衷商
推統籌全局併力進剿以期勿負委任

上諭內閣曰張亮基奏請調道府各員赴湖南差遣等語雲南糧儲道崔光笏貴州黎平府知府胡林翼湖北黃州府知府徐豐玉均著准其調赴湖南以資差委

十四日壬辰羅繞典鮑起豹駱秉章奏言查賊匪

連日用槍礮轟擊西南城角一帶經臣等督飭在事文武竭力防守初四日臣鮑起豹先飭川

兵川勇下城攻擊斃匪多名現在該匪於金雞
橋水道開挖意欲傾陷城池復經臣等豫將火
桶安入轟壞數人誠恐該匪詭計多端省城水
道甚多難保不舍此趨彼雖據原派防石馬鋪
之西鳳營參將閻應敏平涼營遊擊張文行會
稟招回兵丁一百四十七名又漢中營鎮標遊
擊劉宗勝冊報招回弁兵七十七員名而陝安

鎮福誠潼關協副將尹培立等及其餘兵丁尙無下落又派防金盆嶺之沅州協副將朱瀚等所帶九谿等營官兵除陸續報到外合之原存官兵僅止三千有奇賽尙阿等所派援兵僅到鄧紹良管帶之九百名其餘尙未到省新任撫臣張亮基現距楚省僅百餘里省中居民聞有救援人心稍定而賊勢仍屬狡猾臣等惟有督

飭所屬晝夜籌商力保危城斷不致稍有疏失
奏入

上命軍機大臣傳諭賽尙阿程喬采羅繞典張亮基鮑
起豹駱秉章曰賊匪圍攻省城連日用槍礮轟擊西
南城角一帶經在事文武竭力防守殺賊多名該匪
於金雞橋水道開挖意欲傾陷城池復經該撫等豫
安火桶轟散我兵雖疊次獲勝而賊勢仍屬狍猖省

垣重地豈容稍有疏虞著賽尙阿等飛催前派援省
官兵星速前赴長沙合力夾擊毋得稍有遲誤張亮
基現抵常德距省不遠著即迅帶調到各兵赴省救
援相機痛剿其郴州永興一帶賊夥賽尙阿等仍當
嚴扼要隘截其北竄之路陝安鎮總兵福誠潼關協
副將尹培立係帶兵大員何以均無下落是否遇賊
退避以致兵丁潰散其接仗之時首先退縮之弁兵

均著確切查明奏懲辦

同日

上諭內閣曰現在湖南軍務未竣地方閒被賊擾朕每披章奏念吾民流離顛沛深堪憫惻所有湖南被賊各地方應徵本年地丁錢糧著該督撫迅卽確切查明分別奏請恩施以慰廑念

十五日癸巳張亮基奏言臣前行至龍陽以益陽

甯鄉等縣路當要道無兵無餉人心驚恐而益陽尤屬要口是以將甫到之銅仁兵二百名撥往駐防其松桃之二百名暫行留駐常郡擬俟在前途之六百名趕到路出常郡益陽一併帶赴省垣會剿常郡衝要之地不可無兵除前調未到苗兵外又調鎮筸兵八百名來常一面酌留駐防一面由臣分起帶往知會省中內外夾

攻臣卽專弁迎催未到之黔兵星夜赴省援剿
惟思苗兵及鎮筸兵計僅一千八百名常郡地
方寬闊留兵太少不敷防堵而臣帶兵太單進
剿亦恐無濟惟有仰懇

天恩俯准飭令湖北貴州撫臣就近各調兵一千名以
資攻剿

張亮基又奏言臣在滇多年竊觀滇省之兵較

他省訓練似屬認真且滇人與臣相習兵弁亦皆用命合無仰懇

天恩俯准飭令雲貴督臣雲南撫臣挑選大理提標精兵五百名派委龍陵營參將韋中魁管帶來楚聽候調遣奏入

上命軍機大臣傳諭張亮基曰常郡衝要固不可無兵防堵該撫已將黔省先到之銅仁松桃兵擇要分路

防守惟長沙被圍情形萬分緊要調到新兵自應先其所急該撫當星馳前赴長沙地方督飭衡州派來官兵併力夾擊迅解省城之圍以固根本若留守常德一帶專待遠兵何以救目前之急所請湖北貴州兵各一千名已有旨分別飭令酌派備調請撥雲南大理提標精兵五百名亦諭令吳文鎔等挑選惟素習弁兵調度固易得力第恐親信太過稍形畸重則

他兵轉生觀望軍營帶兵此等情形亦應計及惟在知人善任駕馭得宜自無流弊

上又命軍機大臣傳諭吳文鎔吳振械蔣爵遠常大瀆
曰張亮基奏請飭雲南督撫挑選大理提標精兵五
百名等語著吳文鎔吳振械卽照所請挑兵五百名
飭韋中魁管帶赴楚至湖北貴州調兵數已不少所
請各續調兵一千名著常大瀆蔣爵遠酌量情形先

其所急以備調遣

十七日乙未羅繞典鮑起豹駱秉章奏言查該匪

連日攻城經臣等防守嚴緊仍敢於南門開挖

地道豫裝火藥臣等督飭兵勇將伊藥桶焚燒

並殺斃掘洞賊匪署四川綏定營遊擊周兆熊

等直衝賊隊兵丁接踵撲入跟追數里約斃賊

三四百名我兵亦有傷亡初五日該匪復用大

礮對城轟擊將南門城垛打去數尺該匪愈來
愈衆乘勢撲城兵勇槍礮齊施時甚危急適賽
尙阿程喬采飭撥之雲南楚雄協副將鄧紹良
儘先遊擊朱占鼃等統帶湖南鎮筸等營官兵
九百名先後報到臣等一面分飭官紳趕緊用
石條沙袋搶築一面飭該副將等統帶提標綏
靖等標協營兵五百名圍剿該匪亦轉身對敵

我兵奮勇跟追共計斃匪數十名該匪仍分踞民房不出臣等趕緊於城上另築礮臺安放三千斤大礮以備轟擊賽尙阿程喬采等所撥土兵一千名亦已趕到臣等督飭文武晝夜防守並籌度萬全再行進剿奏入

上諭內閣曰逆匪自竄長沙連日攻城屢被官兵擊退其鋒已挫現在各路援兵雲集和春等大兵計亦不

日可到著羅繞典等迅卽會合攻剿並著張亮基督帶所謂官兵速抵省城內外夾攻務將撲城各匪悉數殲除毋稍觀望延緩

十八日丙申向榮奏言臣奉

旨飭歸賽尙阿酌量札調經臣賽尙阿飛咨督臣徐廣綰派員署理廣西提篆照會臣立即起程馳赴長沙省垣聽候調遣臣受

恩深重心非木石豈不知感激思奮實因舊有氣疼之
證時發時止而兩足麻木行動仍不便利皆因
幼年攻打滑縣骹受矛傷又西甯旋師途中忽
染癰疾經年始愈年老衰弱瘴癘交侵以致舊
疾復發步履維艱茲奉

諭旨赴楚援剿惟有力疾前往誓死圖報斷不敢顧惜
身軀自外

生成楚省軍務正在緊急若待督臣委員到日再行交卸起程未免耽延時日臣現將提督印信封固就近送交撫臣勞崇光暫行接收一俟督臣委定有人再由撫臣委員齎印送交署理臣於八月初二日交卸扶病起程由舟前進客俟馳抵長沙謁見臣賽尙阿時再行面商一切奏入

上命軍機大臣傳諭徐廣縉曰前據奏叅向榮藉病規

適當有旨將向榮革職發往新疆茲據向榮奏遵旨
交卸赴楚援勦並詳陳患病情形朕以向榮久歷戎
行屢次優容原爲其才尙可用惟屢於軍務喫緊之
時稱病遷延是以降旨加以嚴懲該革員此次奏報
似尙有愧懼之意著徐廣縉再行察看如向榮實係
知感知懼力疾自效卽由該大臣奏明暫停發遣留
於軍營差遣委用

十九日丁酉羅繞典鮑起豹駱秉章奏言連日賊

衆負固不出初六日臣等飭令雲南楚雄協副將鄧紹良等統帶楚兵並撥川兵五百名川勇四百名出城直攻賊營分作兩隊後隊埋伏前隊進攻自辰至申賊始出巢前後夾擊共斃賊百餘名初七初八等日復令鄧紹良等統帶土兵川兵攻打城南賊營該匪踞巢不出尙未大

受懲創現在碧湘街鼓樓門西湖橋金谿橋一帶民房均爲賊踞黨與甚夥而老龍潭白沙井各處均建高臺其地若安大礮則城中殊爲可慮惟有設法先毀礮臺繼焚民房使彼無地自容庶幾一鼓殲擒不至再留餘孽

羅繞典鮑起豹駱秉章又奏言准新任撫臣張亮基咨現將貴州官兵四百名分派龍陽益陽

該撫臣暫留常德俟四川等省官兵到齊除酌留防堵外餘均親帶赴省援剿等因查益陽龍陽常德距省稍遠且兵分則單現在省城危急萬分雖經賽尙阿程喬采先後撥兵四千餘名尙未到齊專望川黔等兵應援以期厚集兵力迅解重圍奏入

命軍機大臣傳諭賽尙阿程喬采羅繞典張亮基鮑

起豹駱秉章曰賊匪負固不出現在碧湘街一帶民房均爲賊踞黨與甚夥老龍潭等處均建高臺若安設大礮則城中殊爲可慮計惟先毀礮臺繼焚民房使賊失所憑依攻勦更爲得手惟該逆詭詐多端難保非陽圍省城陰圖他竄以爲聲東擊西之計抑或候大夥匪衆續到再圖攻撲亦未可定著羅繞典等密派得力弁兵詳細偵探應如何斷其接應防其逃

竄相機籌辦毋稍大意賽尙阿等所派援兵除鄧紹良已抵長沙外如副將瞿騰龍河北鎮王家琳同知賈亨晉所帶各兵是否到齊著賽尙阿等確切查明儻藉詞逗留卽著一面奏聞一面以軍法從事毋稍寬縱張亮基職任封疆責無旁貸自當前赴長沙就近督率若株守常德又將調到各兵截留省城設有疏虞該撫豈能辭咎著懷遵前旨卽帶現調官兵星

速赴援毋負委任

二十二日

庚子

西安將軍舒倫保副都統常春雙

成奏言本年七月閒奉

旨遴選鎮將以下才堪禦侮人員臣與副都統常春雙

成會商在八旗官員內揀選得曾經出兵曉暢

軍務者協領訥欽布佐領穆精額俱堪備用臣

於去歲到任後揀選官二十餘員精壯兵一千

名內馬上鳥槍四百名撒袋四百名擡礮二百
名教演馬隊槍箭擡槍擡礮準頭俱在七八成
以上常川操演儻遇調遣尙可得力奏入

上命軍機大臣傳諭舒倫保常春雙成曰舒倫保等所
練官兵仍著勤加演習並將需用器械等件製備齊
全聽候諭旨一奉調撥卽派訥欽布穆精額二員統
帶前往

二十三日

辛丑

賽尙阿程喬采奏言據總兵和春

常祿等稟報郴州大駱尙踞州城永興亦尙有
賊踞臣等以省城根本重地情形緊要疊經飛
飭總兵王家琳副將鄧紹良瞿騰龍鳳凰廳三
知賈亨晉等統帶楚豫官兵及苗兵合共四千
餘名星馳前往又於衡州防兵內續行抽撥楚
粵官兵七百餘名交待衛開隆阿副將巴圖帶

領星馳赴省協同援勦和春接到臣等照會及
省城飛咨亦卽選帶楚黔官兵楚勇等二千餘
名取道耒陽衡州赴省救援與瞿騰龍所帶苗
兵均先後過衡星馳前進瞿騰龍簡率精銳苗
兵數十人先行倍道已與鄧紹良賈亨晉等兵
前後馳抵省垣前據和春稟報移營紮定陳家
樓後據郴州本地紳民暨各營探報逆首洪秀

泉現居城內州衙楊秀青現居考棚各有打手
數百防護和春當於朱木山築立新營七月二
十六日賊分兩股來撲每股約有二千餘人總
兵秦定三李瑞知府江忠源各帶兵勇迎擊和
春復令仁勇於隔河處所涉水截擊先後斃賊
四百餘名次日進攻賊壘復斃賊數十名又據
常祿等稟常祿由永興移營進紮小平沖查該

處距永興縣城十里有餘距賊營亦四五里一路茶山蹊徑叢雜難以進兵適德亮帶領張國樑等潮捷各勇四千餘名分兩路進紮常祿親率弁兵繞出賊營左近查看距靈龜橋二里許賊營三處勢相倚角移營攔擊會合張國樑等進攻復殺賊數百名並將賊營焚燬惟賊勢聯絡人數比前較多當飭捷勇等營另行設法進

攻臣等確探逆首大夥尙在郴州永興之賊分踞亦衆勢不能不通盤計畫惟長沙爲南省會垣必應極力赴援當卽夤夜檄催諸軍星馳前往計由衡撥出並和春等帶來兵勇合之省城存兵已有萬餘名卽日和春等兵到齊合力剿擊當可無虞現在廣西提督向榮經臣賽尙阿檄調到衡臣已令赴長沙將四川河南陝西等

處官兵交其統領與和春等同心勦力奮勉圖
功臣程喬采已札令四川續到新兵行抵荊州
等處卽繞道赴岳州迎勦以防賊匪北竄江漢
之路臣賽尙阿先已咨行福建督撫臣將閩省
新兵取道江西來楚如賊竄至吉袁等屬卽可
攔頭迎勦惟郴州兵勇分布已單經和春分兵
赴援省城兵力更虞不足廣東仁化匪徒擾及

樂昌現屯乳源縣之坪溪等處恐竄越楚境與
郴州逆匪串合永興之賊較前轉多非但土匪
附從難保郴州之賊不因和春分兵潛由小路
分赴永興救應臣等現飭李瑞常祿等極力嚴
堵並密令不時偵探如郴州之賊又赴永興卽
飭常祿等兵一面進攻永興以分賊勢一面乘
郴州賊少出其不意會合進剿臣等仍駐衡州

調度

賽尙阿程喬采又奏言據調任湖南巡撫張亮
基咨該撫臣行抵沅江縣距省三百里聞賊偏
省城不能前進當卽折回常德府城適值貴州
銅仁松桃營兵四百名到郡經該撫臣奏明截
留分防查常德府城距省西偏尙數百里現在
賊匪竄偏省城正望新兵厚集援剿所有貴州

新兵一千名自應由該郡星速晉省斷難令在
常郡駐防應請

旨飭令該撫臣務將前項新兵卽行帶領由常赴省會

勦又據湖北撫臣常大滄咨現已奏明賊情緊

急請將南省軍營所調湖北官兵剋日撥回調

遣查湖北官兵正在軍前勦賊喫緊之際應請

毋庸撤回至江西吉安袁州等屬本與長沙接

壤該省額兵較少已由臣等將九江鎮總兵清保所帶兵一千名由郴州南路調回飭由醴陵萍鄉一路交界相機堵禦其九江鎮後營遊擊長春所帶兵一千名現在長沙守城臣賽尚阿亦囑向榮等到省後酌量情形如有他省官兵可以更替亦卽令其撤回以資防守

賽尙阿程喬采又奏言再查有四川提督蘇布

通阿年富力强提督向榮深悉其能茲當軍前
需人之際合無仰懇

天恩飭下該提督蘇布通阿卽由川省迅速馳赴湖南
軍營以資臂使奏入

上命軍機大臣傳諭賽尙阿程喬采羅繞典張亮基鮑
起豹駱秉章曰賽尙阿程喬采奏逆首洪秀泉楊秀
青等均在郴州城內並分踞永興縣城是大股逆匪

尙在郴州永興分股撲省安知非牽掣官兵爲聲東
擊西之計現在各路援兵陸續到省張亮基何以行
抵常德輒將新調之兵分撥截留遷延不進著羅繞
典張亮基駱秉章會同鮑起豹博勒恭武向榮和春
等迅飭各路兵勇分投布置務將撲城股匪全數殲
除毋得觀望延緩任令旁竄至郴州永興兩處俱報
小有勝仗仍稱賊營聲勢聯絡又稱賊中人數比前

較多是所報獲勝情形尙恐不實不盡賊勢仍向北
竄未見能迎頭截擊此中調度布置宜有把握切勿
僅據稟報飾詞又墮賊匪奸計逆匪入楚後附從土
匪雖多皆係烏合之衆其自粵來悍賊總計不過數
千如能將大股逆匪痛剿其餘脅從自然瓦解衡州
現有程喬采督兵防守賽尙阿自應統兵赴省就近
調度仍著通盤籌畫勿誤事機至請將貴州新兵一

千名督催赴省及湖北官兵毋庸撤回江西官兵酌量調回防堵之處均著賽尙阿酌量緩急分別辦理

上又命軍機大臣傳諭徐廣縉曰本日賽尙阿等奏向榮已由廣西馳抵衡州檄令統帶四川河南陝西官兵赴長沙勦辦撲城賊匪察其此次赴楚迅速不敢仍前遷延觀望該革員本非不可用之才湖南又當軍務喫緊之際果能奮勉自效原不難寬其罪戾量

予恩施徐廣縉此時諒可馳抵湖南軍營接受欽差大臣關防如向榮實已悔過自新卽飭令統帶官兵勉圖後效如省圍已解應如何迎頭截擊不令該匪擾及湖北江西各界著該大臣相機調度朕亦不爲遙制也

上諭內閣曰前因向榮稱病遷延降旨革職發遣茲據賽尙阿奏稱前經檄調向榮由粵赴楚現已馳抵衡

州飭令統兵卽赴長沙應援該革員此次遵調來楚
尙爲迅速著暫緩發遣卽令統帶四川河南等處官
兵奮勉勦賊帶罪圖功以觀後效

上又諭內閣曰四川提督蘇布通阿著馳驛前赴湖南
軍營聽候欽差大臣調遣

二十六日甲辰程喬采奏言臣前因逆氛竄楚應

將永州支應局改作糧臺飭據總理局務之衡

永郴桂道張其仁會同廣西臬司姚瑩鹽道許
祥光議稟凡由粵追勦來楚官兵仍歸粵員支
應其湖南原防兵勇及續調兵丁卽歸楚員支
付奏奉

俞允嗣因逆匪竄擾長沙各官兵分股攻勦離永較遠
又將糧臺改駐衡州在案臣將粵省支發章程
逐加查覈凡屬鹽糧銀數無不例外加增閱時

已久浮濫滋多卽如兵丁鹽菜口糧每名日給銀八分米八合三勺已屬與例不符又每百名給長夫五十名外加挑運鑼鍋器械長夫三十名合計每兵百名卽需長夫八十名又如武職鹽糧長夫除提鎮大員該省係隨時酌定外如副將一員外省者每月支給銀六十五兩四錢零本省者支給銀四十二兩四錢零比較楚省

連鹽糧馬乾跟役共議給銀三十一兩七錢零
數已多寡不同且該省復議有長夫銀兩副將
例馬十二匹折夫二十四名外加增二十八名
每名價銀一錢每月卽需銀五兩二錢又該省
每派一營員卽支給長夫銀兩至派赴軍營辦
事及管理行營糧員暨各省投效各官亦均支
給長夫名數其中浮冒甚多兵踰數萬官亦不

下千百餘員各有長夫若干名卽日需工價銀若干兩旣無防剿之別又無行坐之分聚少成多經費實難爲繼又查該省雇募壯勇價比兵餉爲優且亦給予長夫計口授食實則未曾足數所費尤屬不貲夫

國家不得已而用兵今更不得已而用勇如該勇果能助我兵力原亦不必惜費但恐有名無實

轉致別滋事端因思該兵丁等或枕戈遠戍或用命疆場現又值分勦萬緊之時不但鹽糧仍應照舊支給卽長夫一項亦須令其得沾餘潤以期士氣飽騰至武職各員如果盡力戎行勤勞克著自有

酬庸懋賞似應將其鹽糧長夫量爲酌減或分防勦或分行坐總期力求樽節庶可杜浮銷而重帑項

奏八

上命軍機大臣傳諭勞崇光曰用兵以籌餉爲最要若於例外浮加伊於胡底長夫不過爲挑運器物之用何以文員武職支給各數十名之多兵勇長夫亦漫無限制前任巡撫鄒鳴鶴督率糧臺大員專司其事何以任意開銷毫無察覈著勞崇光確查據實具奏並將細冊迅速咨送戶部其浮冒侵吞各員著卽嚴

衆毋稍含混

程喬采又奏言探聞郴州大股逆匪因聞長沙賊匪疊次被創已於十一十二等日由小路分逃自係竄往省城助勢經總兵李瑞等分帶兵勇緊接跟追該逆竄往永興臣等已飭常祿等趕緊力籌堵剿

程喬采又奏言臣思逆匪分股肆竄逼近長沙

省城岳州緊在下游情形喫重一經大兵圍剿
向北狂奔不但岳州正當其衝卽北省亦必震
動署提臣雙福現經到楚自應趕緊接篆卽令
坐鎮武昌博勒恭武仍行駐紮岳州庶兩處俱
有大員駐守防禦益臻慎密奏入

上命軍機大臣傳諭賽尙阿程喬采羅繞典張亮基鮑
起豹駱秉章曰逆匪由郴州永興北竄長沙中閒尙

有攸縣安仁醴陵等處若從中路衝截賊勢必不能
會合若未能扼要布置不但爲長沙撲城股匪助勢
安知不由瀏陽平江北窺湖北分竄江西大營將驕
卒玩錮習已成兵勇雖衆遣調無策試問賊匪全股
越過衡郡而北勢若燎原誰執其咎耶博勒恭武前
飭赴援長沙據程裔采奏留仍駐岳州以現在情形
而論自以控扼岳州爲要但亦須於平江一帶擇要

紮營使賊不能由陸路竄赴通城崇陽水陸兼扼更爲周密至長沙城外之賊屢被勦敗負固不出自因官兵勢盛待後路賊匪救援或圖會合他竄羅繞典張亮基等亟應激勵各路兵勇將城外賊營痛加勦洗切勿坐視株守失此機會

同日署江西巡撫布政使陸元烺奏言查粵逆由醴陵徑往長沙滋擾勢必四出奔竄江省連

界隘口甚多若不處處設備難期周妥況聞湖南之瀏陽廣東之仁化翁源等縣各有土匪聚衆滋事延及江西邊境則南昌府屬之義甯州袁州府屬之萍鄉萬載南安府屬之大庾崇義等縣又不可不添兵迎擊因念閩省之汀州浙省之衢州二鎮均與江西接壤徵調較易擬由臣就近飛咨閩浙督撫臣在於汀衢二鎮各選

精兵一千名配齊軍火器械派委得力將弁管帶飭令星夜兼程來江以憑分撥防守奏入

上命軍機大臣傳諭王懿德黃宗漢曰江西需兵孔急著王懿德黃宗漢於福建所屬之汀州鎮浙江所屬之衢州鎮各選精兵一千名配帶軍裝器械派委得力將弁管領星速馳赴江西交署巡撫張芾分撥防剿

上又命軍機大臣傳諭張芾曰陸元烺奏江西需兵甚急就近調撥閩浙精兵堵剿已准其於福建汀州浙江衢州兩鎮營內就近各調精兵一千名由各該督撫派得力將弁管帶迅赴江西交張芾會同在籍尙書陳孚恩布政使陸元烺酌量分撥防守該署撫務須督飭地方文武各員嚴密巡防毋令賊匪闖入境內湖南軍營前調福建精兵三千名經賽尙阿奏令

由江西行走如已行抵江西著張芾等酌度緩急截
留備用

二十九日丁未羅繞典鮑起豹駱秉章奏言臣等

連日進攻賊營該逆負固不出初十日復令雲
南楚雄協副將鄧紹良等督兵進攻南門外賊
營先由城左將房屋燒燬復從右拋擲火彈燒
去賊之哨棚數十閒賊於牆孔暗放槍礮官兵

亦多受傷隨即撤回十一十二等日賊匪分踞高嶺遠瞰城內經我兵開礮轟斃多名時河北鎮王家琳管帶河南兵一千名來省次日鄧紹良等約會王家琳分路進剿槍斃賊匪百餘名王家琳由北路小西門前進該匪半踞民房半紮山頂當卽督飭前隊拋放火罐火彈燒燬賊住民房該匪由南路後山紛逃約斃匪二百餘

人適值綏靖鎮和春鎮遠鎮秦定三等統帶貴
州等省弁兵先後到省和春於十五日出隊兵
勇分兩隊攻打賊巢該逆負嵎堅守仍由牆孔
開礮回擊我兵自卯至午連開大礮打入牆內
經知府江忠源管帶楚勇槍至牆邊奪獲大黃
綢旗一面該匪匿而不出查該匪居高負固所
恃輒牆林立勦旣難於成圍焚又不能徧及我

出則伏匿我歸則又攻城必須步步爲營先規地勢已商令和春於白沙井上首之蔡公墳紮營王家琳亦於小西門外紮營均屬偏近賊巢防勦均可兼顧向榮現准賽尙阿照會來省於賊情較爲熟悉容俟籌商設法圍勦風聞逆首實在郴州刻下大夥均有來省之信須於衡州安仁攸縣醴陵一帶豫爲堵截臣等亦經密咨

賽尙阿程喬采並兩廣督臣徐廣縉諄飭將備沿途嚴密布置以免勾結奏入

上命軍機大臣傳諭賽尙阿程喬采羅繞典張亮基鮑起豹駱秉章曰長沙城外賊匪總計不過三四千人我兵勇多至數倍自應乘後隊賊衆未到以前及早勦洗據稱該匪居高負固輒牆林立聞南門外妙高峯地勢尙不甚高民屋輒牆雖然堅固豈能屹若城

壙難於攻破初十十一二等日接仗僅止互相轟擊
十三日分路進剿王家琳督帶弁兵尙屬勇往而十
五日和春等分兩隊攻打賊巢自卯至午僅十餘礮
打入牆內則兵勇之距牆甚遠發礮無準已可概見
獨委員江忠源管帶楚勇槍至牆邊其餘將弁兵丁
何不同時搶進且賊營占地無多我軍宜各路會合
四面環攻同時並舉何得分日輪流出隊任令負隅

抗拒總由官兵積久疲玩不能併力向前和春自統諸軍以來惟事尾追道州郴州等處任賊衝突蹂躪竟無與賊鏖戰之時此次帶兵援剿若再不奮勉出力致郴州永興大夥賊匪北竄復行串合自問當得何罪現在向榮已到長沙著羅繞典張亮基等卽會同籌議剋日分派諸軍會合進剿務將城外屯踞賊匪全數殲擒毋再遷延時日賽尙阿程喬采現在衙

州距攸縣安仁等處近在咫尺豈得坐視賊匪竄越
務卽派兵從中路攔截並飭常祿等迅速進兵夾攻
仍飛咨台湧博勒恭武於荊州岳州水陸各要隘及
常德一帶嚴加堵截其江西與湖南交界地方一體
飛咨嚴防毋任竄擾